

## **Kalaallit Nunaanni pinerluttulerinermik inatsit malillugu toqqammavigisassat ivertinneqartut pillugit nalunaarut**

Inatsimmik allanngorneri ilanngullugit nalunaarutiginninneq 1187, 18. september 2023-meersoq malillugu Kalaallit Nunaanni pinerluttulerinermik inatsimmi, kingullermik inatsisikkut nr. 411, 23. april 2024-meersukkut allanngortinneqartumi, § 163, imm. 3 malillugu malillugu, aalajangersarneqarput:

### **Kapitali 1**

#### *Toqqammavigisassanik atorfinitsitsineq*

§ 1. § 18 malillugu, toqqammavigisassanik ataqatigiissaarisup innersuussuteqarneratigut, innersuussinermi atugassaminik pisariaqartinneqartumik kommunini oqartussaasunik ilanngussisussaasup, toqqammavigisassanik arlalinnik amerlassusilinnik Kalaallit Nunaanni najugaqartunik Kalaallit Nunaanni Politiit pisortaat atorfinitsitsissaaq. Kalaallit Illuutaannit Københavniimittumit innersuussinerit malillugit, toqqammavigisassanik arlalinnik amerlassusilinnik Danmarkimi najugaqartunik Pinerluttunik Isumaginnittoqarfiup Pisortaqarfia atorfinitsitsissaaq.

*Imm. 2.* Inuit gruppui, imm. 3 malillugu toqqammavigisassatut pingaartumik atorfinitsitsiffiusussatut eqqarsaatigineqartut, allagarsiussamik ilisimasaqalernissaat qulakkeerniarlugu, toqqammavigisassatut atorfinnut suli inuttalerneqanngitsunut qinnuteqaatit tusagassiuutini, sulianut tunngasuni atugassiani imaluunniit periaaseq alla atorlugu allagarsiussinikkut qaaqquneqassapput.

*Imm. 3.* Qinnuteqartut, suliassanik, suliassap kingunerisaanik suliqaarnissamat naleqqunnerpaatut isigineqartut akornanni atorfinitsinneqassapput, matumani inuit peqqinnissaqarfimmut-isumaginninnermut- aamma ilinniartitaanermut suliassaqarfimmut attuumassuteqartut ilanngullugit. Sapinngisamik inuit kalaallisut qallunaatullu oqalussinnaasut atorfinitsinneqassapput.

Slotsholmsgade 10  
1216 København K.

T +45 7226 8400  
F +45 3393 3510

www.justitsministeriet.dk  
jm@jm.dk

*Imm. 4.* Inuit tarnikkut nappaatilinnut napparsimavimmi imaluunniit napparsimavimmi immikkoortortaarfimmi, inunnut annertuumik tarnikkut innarluutilinnut paaqqinniffinni il.il. atorfeqartut, napparsimavimmi imaluunniit immikkoortortaarfimmi tassani imaluunniit paaqqinniffimmi tassani sulisussatut toqqammavigisassatut atorfinitsinneqassanngillat. Inunnut, tarnikkut nappaatilinnut napparsimavimmi imaluunniit immikkoortortaarfimmi pineqartumi imaluunniit paaqqinniffimmi pineqartumi il.il. ingerlatsinermik imaluunniit allaffissornermik allakkut suliaqartunut, tamanna aamma atuuppoq. Unnerluussisussaataasuni, politiini aamma pinerluttunik isumaginnittuni atorfillit toqqammavigisassatut atorfinitsinneqartariaqanngillat.

*Imm. 5.* Politiinit oqaaseqaammik sioqqullugu pissarsinikkut, toqqammavigisassat atorfinitsinneqassapput. Allakkatigut akuersititsinerup kingorna, politiit oqaaseqaammik tunniussitinnatik, qinnuteqartoq pillugu Det Centrale Kriminalregisterimi paasisutissanik pissapput.

*Imm. 6.* Inuit, Kalaallit Nunaanni toqqammavigisassatut atorfinitsinneqartut amerlassusaat, pisariaqartitsinerup nalilersorneqarnera tunngavigalugu Kalaallit Nunaanni politiit pisortaannit aalajangerneqassapput. Inuit, Danmarkimi toqqammavigisassatut atorfinitsinneqartut amerlassusaat, pisariaqartitsinerup nalilersorneqarnera tunngavigalugu Pinerluttunik Isumaginnittoqarfiup Pisortaqarfianit aalajangerneqassapput.

**§ 2.** Toqqammavigisassat Kalaallit Nunaanni najugallit atorfinitsinneqartut pillugit Kalaallit Nunaanni politiit pisortaat nalunaarsuummik suliaqassaaq. Toqqammavigisassat Danmarkimi najugallit atorfinitsinneqartut pillugit Pinerluttunik Isumaginnittoqarfiup Pisortaqarfia nalunaarsuummik suliaqassaaq.

*Imm. 2.* Toqqammavigisassat Danmarkimi najugallit atorfinitsinneqartut pillugit nalunaarsuut, Kalaallit Nunaanni politiit pisortaannut nassiunneqassaaq.

*Imm. 3.* Toqqammavigisassat Kalaallit Nunaanni najugaqartut atorfinitsinneqartut pillugit nalunaarsuummi allannguuteqartillugit, nalunaarsuummik nutartikkamik Kalaallit Nunaanni politiit pisortaat suliaqassaaq. Toqqammavigisassat Danmarkimi najugaqartut atorfinitsinneqartut nalunaarsuummi allannguuteqartillugit, nalunaarsuummik nutartikkamik Pinerluttunik Isumaginnittoqarfiup Pisortaqarfia suliaqassaaq, taannalu Kalaallit Nunaanni politiit pisortaannut nassiunneqassaaq.

§ 3. Inuit, Kalaallit Nunaanni pinerluttulerinermi inatsimmi § 163, imm. 1 aamma 2 malillugit toqqammavigisassamik ivertitsivigineqarnissamik pisinnaatitaasut pillugit Kalaallit Nunaanni politiit pisortaat qaammatit tamaasa nalunaarsuummik suliaqassaaq.

## Kapitali 2

### *Toqqammavigisassat ivertinneqarnerat*

§ 4. Kalaallit Nunaanni pinerluttulerinermi inatsimmi § 157 malillugu inuk pineqaatissinneqartussatut eqqartuunneqarpat imaluunniit § 161 malillugu tigummigallagaanissamik eqqartuunneqarpat, Kalaallit Nunaanni pinerluttulerinermi inatsimmi § 163, imm. 1 malillugu pineqartumut eqqartuussivik toqqammavigisassamik ivertitsisinnaavoq.

*Imm. 2.* Kalaallit Nunaanni pinerluttulerinermi inatsimmi § 163, imm. 2-mi piumasaaqatit naammassineqarpata, pineqartumut eqqartuussivik aammattaq toqqammavigisassamik ivertitsisinnaavoq.

*Imm. 3.* Pissutissalimmik pasisap imaluunniit eqqartuunneqartup qaniginerpaasai ajornanngippat toqqammavigisassatut ivertinneqassapput.

§ 5. Pissutissalimmik pasisamut imaluunniit unnerluunneqartumut toqqammavigisassamik ivertitsisoqarnissaa politiit naatsorsuutigippassuk, apeqqut eqqartuussivimmut piaarnerpaamik saqqummiunneqassaaq, taamaalilluni toqqammavigisassatut ivertitsisoqassappat ivertinneqartoq, suliap suliarineqarnerani peqataanissaminut periarfissinneqarniassammat.

*Imm. 2.* Eqqartuussamut, suliap suliarineqarnerani toqqammavigisassamik taamaattumik ivertitsivigineqarsimanngitsumut, toqqammavigisassamik ivertitsisoqassappat, eqqartuussut nalunaarutigineqarpat, pisariaqartinneqarpat politiit apeqqut eqqartuussivimmut malugeqqussavaa. Eqqartuussaq Kalaallit Nunaanni inissinneqassappat, toqqammavigisassaq Kalaallit Nunaanni najugalik ivertinneqassaaq. Eqqartuunneqartoq Danmarkimi inissinneqassappat, toqqammavigisassaq Danmarkimi najugalik ivertinneqassaaq.

*Imm. 3.* Eqqartuunneqartoq suliap suliarineqarnerata nalaani toqqammavigisassamik Kalaallit Nunaanni najugalimmik ivertitsivigineqarsimappat, toqqammavigisassap najugaa pissutigalugu tamanna naleqquttuuppat, eqqartuussinerup kingorna toqqammavigisassaq ingerlaqqissaaq. Eqqartuunneqartoq suliap suliarineqarnerani toqqammavigisassamik Danmarkimi najugalimmik ivertitsivigineqarsimappat aamma Danmarkimi inissinneqartussaappat, eqqartuussinerup kingorna toqqammavigisassaq ingerlaannassaaq.

*Imm. 4.* Inuk Danmarkimi inissineqartussatut eqqartuunneqarsimasoq, allaffissornikkut Kalaallit Nunaanni inissineqartussatut nuunneqarpat, toqqammavigisassamik nutaamik Kalaallit Nunaanni najugalimmik ivertitsisoqassaaq. Inuk Kalaallit Nunaanni inissineqartussatut eqqartuunneqartoq, allaffissornikkut Danmarkimi inissineqartussatut nuunneqarpat, toqqammavigisassamik nutaamik Danmarkimi najugalimmik ivertitsisoqassaaq.

**§ 6.** Matumuuna § 4, imm. 3 malillugu, toqqammavigisassatut ivertinneqarsinnaasumik nassaarniarnermi politiit eqqartuussivik ikiussavaat. Pissutissalimmik pasisaq, unnerluunneqartoq imaluunniit eqqartuunneqartoq, ivertinneqartussatut inummik aalajangersimasumik kissaateqarnersoq, ivertitsineq sioqqullugu pineqartumut apequtigineqassaaq.

*Imm. 2.* Pissutissalimmik pasisaq, unnerluunneqartoq imaluunniit eqqartuunneqartoq inummik nammineerluni toqqaanngippat, qanigisaqanngippat, imaluunniit pineqartut arlaannaalluunniit ivertinneqartussatut piumanngippata imaluunniit naleqquttuunngippata, politiit toqqammavigisassatut nalunaarsuiffimmit toqqammavigisassamik innersuussissapput, taamaattoq imm. 3-miit 7 ilanngullugu takukkit.

*Imm. 3.* Eqqartuunneqartoq Kalaallit Nunaanni inissineqassappat, § 18 malillugu toqqammavigisassanut ataqatigiissaarisoq tusarniaavigereerlugu, toqqammavigisassaq toqqammavigisassat Kalaallit Nunaanni najugallit pillugit nalunaarsuiffimmi tullinnguuttoq innersuunneqassaaq, taamaattoq imaalillugu ivertitsinermi toqqammavigisassap najugaa kiisalu oqaatsitigut pissutsillu allat attuumassuteqartut eqqarsaatigineqassallutik.

*Imm. 4.* Eqqartuunneqartoq Danmarkimi inissineqassappat, Kalaallit Illuutaat Københavnimiittoq tusarniaavigereerlugu toqqammavigisassaq, toqqammavigisassat Danmarkimi najugallit pillugit nalunaarsuiffimmi tullinnguuttoq innersuunneqassaaq, taamaattoq imaalillugu ivertitsinermi toqqammavigisassap najugaa kiisalu oqaatsitigut pissutsillu allat attuumassuteqartut eqqarsaatigineqassallutik.

*Imm. 5.* Toqqammavigisassap pineqartup suliffia assigisaaluunniit, matumani assersuutigalugu pineqartumut isumaginnittoqarfimmi sulianik suliarinnittuunera ilanngullugu, pissutissalimmik pasineqartorpiaap, unnerluunneqartorpiaap imaluunniit eqqartuunneqartorpiaap soqutigisaanik pissusissamisoortumik suliarinninnissamut pineqartup naleqquttuuneranut nalornilersitsisinnaasut pissutigalugit, nalunaarsuiffimmi tullinnguuttoq innersuunneqassaaq.

*Imm. 6.* Eqqartuussivimmut innersuussinissaq sioqqullugu,

toqqammavigisassaq pineqartoq kiisalu pissutissalimmik pasisaq, unnerluunneqartoq imaluunniit eqqartuussaasoq, innersuussinissaq eqqarsaatigineqartoq pillugu oqaaseqartinneqassaaq. Toqqammavigisassap aggersinnaanginnissaa, assersuutigalugu aallarnej, napparsimaneq assigisaaluunniit pissutigalugit, politiit aammattaaq qulakkiissavaat. Tamatuma peqatigisaanik kina pissutissalimmik pasisap, unnerluunneqartup imaluunniit eqqartuunneqartup illersuisorineraa, politiit toqqammavigisassamut ilisimatitsissutigissavaat. Toqqammavigisassaq ivertinneqartussat eqqarsaatigineqartoq toqqammavigisassat pillugit nalunaarsuummi ilanngunneqarsimanngippat, innersuussisoqartinagu, allakkatigut akuersissummik pereernikkut, inuk taanna pillugu Det Centrale Kriminalregisterimi paasissutissanik pissarsisoqassaaq.

*Imm. 7.* Pineqartoq pissutissalimmik pasisanut, unnerluunneqartunut imaluunniit eqqartuunneqartunut allanut ivertinneqareersimappat, toqqammavigisassaq, toqqammavigisassat pillugit nalunaarsuummi ilanngunneqarsimasoq ivertinneqarnissamut innersuussineq itigartitsissutigisinnavaa.

§ 7. Pissutissalimmik pasisamit, unnerluunneqartumit imaluunniit eqqartuunneqartumit toqqammavigisassap ivertinneqareersup allamik taarserneqarnissaanik qinnuteqaat unnerluussisussaataitaasunut saqqummiunneqarpat, eqqartuussivimmut siullermeerinniffiusumik eqqartuussiviusimasumut apeqqt unnerluussisussaataitaasut piaarnerpaamik saqqummiutissavaat.

### Kapitali 3

#### *Toqqammavigisassap suliassai aamma pisinnaatitaaffii il.il.*

§ 8. Pissutissalimmik pasisaq, unnerluunneqartoq imaluunniit eqqartuussaq isumasioqatigereerlugu, toqqammavigisassaq sapinngisamik iliuuseqassaaq.

§ 9. Pinerluttulerinermik suliap suliarineqarnerata nalaani toqqammavigisassap ivertinneqartup, matumuuna Kalaallit Nunaanni pinerluttulerinermi inatsimmi § 163, imm. 1 malillugu illersuisoq ivertinneqartoq peqatigalugu, pissutissalimmik pasisaq imaluunniit unnerluunneqartoq siullermik ikiugassaraa. Eqqartuussisoqareernerata kingorna, Kalaallit Nunaanni pinerluttulerinermi inatsimmi § 163, imm. 2 malillugu eqqartuunneqartup qanoq issusaa pillugu tusarlerneqarnissaq aamma napparsimavimmi, napparsimaviup immikkoortortaarfiani, paaqqinniffimmi imaluunniit inissiisarfimmi unikkallarnerup aamma pineqaatissiinerit allat pisariaqanngitsumik sivitsorneqarnissaa isumagissavaa.

*Imm. 2.* Toqqammavigisassap naammagittaalliorsinnaaneq pillugu aamma Kalaallit Nunaanni pinerluttulerinermi inatsimmi §§ 159 aamma 162 malillugit pineqaatissiissutigineqartup allangortinneqarnissaa imaluunniit atorunnaarsinneqarnissaa pillugit pissutissalimmik pasisaq, unnerluunneqartoq imaluunniit eqqartuunneqartoq siunnersussavaa. Pineqaatissinneqarnerup allangortinneqarnissaa imaluunniit atorunnaarsinneqarnissaa pillugu naammagittaalliorneq pillugu allagaqartoqassappat allakkat noqqaassutillu ilusilersorneqarnissaanut pineqartoq toqqammavigisassap ikiussavaa kiisalu suliat taakku suliarineqarneranni ikiussallugu.

**§ 10.** Ivertinneqarnerup kingorna piaarnerpaamik toqqammavigisassap pissutissalimmik pasisaq, unnerluunneqartoq imaluunniit eqqartuunneqartoq pulaassavaa aamma taanna attaveqarfigiinnavissallugu. Pulaarneq siullerpaamik pulaarnerup saniatigut pisariaqartitsineq malillugu pisassaaq.

*Imm. 2.* Eqqartuunneqartoq Danmarkimi inissinneqarpat, taamaattoq toqqammavigisassap eqqartuunneqartoq qaammammut minnerpaamik ataasiarlugu pulaartassavaa. Eqqartuunneqartup Kalaallit Nunaanni ilaqutaanut attaveqatigiinnerup naammaginartup attanneqarnissaanut toqqammavigisassaq aamma eqqartuunneqartumut ikiuuttassaaq aamma inuussiortoqartillugu, nalliuttoqartillugu il.il. eqqartuunneqartoq ilassiortassallugu.

*Imm. 3.* Pineqartumut killilersugaanngitsumik aamma inuttut akornusersorneqarnani, allakkatigut oqarasuaatikku allaveqarnissaq toqqammavigisassap pisinnaatitaaffigaa. Pissutissalimmik pasisaq imaluunniit unnerluussaasoq Kalaallit Nunaanni eqqartuussisarnermik inatsimmi § 359, imm. 1, nr. 2, litra c malillugu tiggummigallagaappat, aamma allakkanik- aamma pulaarnissamut nakkutiginninnissaq politiinit aalajangerneqarsimasoq toqqammavigisassamit malinneqarnissaa pinerluttoqarsimaneranik paasiniaanermut pingaarutilimmik innimiginninnissap pisariaqartippagu, tamanna atuutinngilaq. Tamanna pillugu aalajangiisoqarpat, pissutissalimmik pasisap imaluunniit unnerluussap illersuisua ilisimatinneqassaaq, soorlu aamma Kalaallit Nunaanni eqqartuussisarnermik inatsimmi §§ 379-imi aamma 380-imi suleriaaseq malinneqassasoq.

**§ 11.** Pissutissalimmik pasineqartoq, unnerluunneqartoq imaluunniit eqqartuunneqartoq pillugu qaqugukkut eqqartuussisoqarnissaa pillugu, matumani toqqammavigisassamik nutaamik ivertitsisoqarnissaa siunertaralugu eqqartuussinerit ilanngullugit, toqqammavigisassaq

eqqartuussiviup nalunaarfigisassavaa.

*Imm. 2.* Pinerluttoqarsimaneranik paasiniaanermut tunngasumik innimigisassat qaqutiginnaq taamaaliortoqarnissaanut akerliliinngippat, pissutissalimmik pasisaq, unnerluunneqartoq imaluunniit eqqartuunneqartoq pillugu eqqartuussutit aalajangiinerillu pillugit takussutissiat qinnuteqarneqarnikkut toqqammavigisassamut tunniunneqassapput. Pissutissalimmik pasisaq, unnerluunneqartoq imaluunniit eqqartuunneqartoq taamaaliortoqarnissaanut akuersissuteqarpat, pissutissalimmik pasisap, unnerluunneqartup imaluunniit eqqartuunneqartup inuttut atugarisai aamma tarnikkut qanoq issusaa aammattaaq qinnuteqarnikkut toqqammavigisassamut tunniunneqassapput.

*Imm. 3.* Ivertitsinerup peqatigisaanik pissutissalimmik pasisap, unnerluunneqartup imaluunniit eqqartuunneqartup inunnik nalunaarsuisarfimmi adressia aamma kingullermik najugaa ilisimaneqartoq pillugu politiit toqqammavigisassaq ilisimatissavaat. Tamatuma saniatigut toqqammavigisassap noqqaassuteqarneratigut pissutissalimmik pasisap, unnerluunneqartup imaluunniit eqqartuunneqartup inunnik nalunaarsuisarfimmi adressia aamma kingullermik najugaa ilisimaneqartoq, politiit toqqammavigisassamut ilisimatitsissutigissavaat.

**§ 12.** Suliani Eqqartuussiviit Qullersaannut saqqummiunneqartussani, naammassinninnissamik naalakkiutip nalunaarutigineqarnissaata tungaanut, suliassat §§ 5, 6, aamma 11 malillugit politiinit suliarineqartussat, Naalagaaffiup unnerluussisuata suliarissavai.

**§ 13.** Eqqartuussaasunut Kalaallit Nunaanni inissinneqartussanut toqqammavigisassat ivertinneqartut pisariaqartinneqartumik annertussusilimmik toqqammavigisassap pisinnaatitaaffii pisussaaffiilu pillugit, § 18 malillugu toqqammavigisassanut ataqatigiissaarisup toqqammavigisassaq ilisimatissavaa.

*Imm. 2.* Eqqartuussanut Danmarkimi inissinneqartussanut toqqammavigisassanit ivertinneqartunit noqqaassuteqarnikkut pisariaqartinneqartumik annertussusilimmik toqqammavigisassap pisinnaatitaaffii pisussaaffiilu pillugit Københavnimi Kalaallit Illuutaata toqqammavigisassaq ilisimatissavaa.

**§ 14.** Toqqammavigisassap noqqaassuteqarneratigut, pisariaqartinneqartumik annertussusilimmik aamma Kalaallit Nunaanni eqqartuussisarnermik inatsimmi aalajangersakkat eqqarsaatigalugit kiisalu nalunaarummi matumani § 10, imm. 3-mi, aamma § 11, imm. 2-mi

aalajangersakkat eqqarsaatigalugit, suliaq pillugu pissutissalimmik pasisap, unnerluunneqartup imaluunniit eqqartuunneqartup illersuisuata toqqammavigisassaq ilisimatissavaa.

§ 15. Napparsimaviup imaluunniit napparsimavimmi immikkoortortaqrifiup, paaqqinniffiup imaluunniit isertitsiviup il.il. inummik, toqqammavigisassamik ivertitsiviusumik tiguisup, sumiiffimmi tassani najugaqarnissani pineqartup aallartippagu, piaarnerpaamik toqqammavigisassaq nalunaarfigissavaa.

*Imm. 2.* Sumiiffimmi tassani pineqartup najugaqarnini naammassippagu, napparsimaviup imaluunniit napparsimavimmi immikkoortortaqrifiup, paaqqinniffiup imaluunniit inissiisarfiup, taamatuttaaq toqqammavigisassaq nalunaarfigissavaa.

§ 16. Taassuma suliassaminik illersorneqarsinnaasumik suliarinninnissaanut pisariaqartinneqartunik, napparsimaviup imaluunniit napparsimavimmi immikkoortortaqrifiup, paaqqinniffiup imaluunniit inissiisarfiup il.il. aammattaaq paasissutissanik suugaluartunilluunniit toqqammavigisassaq tunissavaa. Paasissutissaq nakorsartinnermut tunngasumik pissutissalimmik pasisamut, unnerluunneqartumut imaluunniit eqqartuunneqartumut tunniunneqarsinnaanngitsoq, aammattaaq toqqammavigisassamut tunniunneqassanngilaq.

*Imm. 2.* Pissutissalimmik pasisap, unnerluunneqartoq imaluunniit eqqartuunneqartoq, pineqartumit ivertitsivigineqartoq, pillugu ataavartumik attuumassuteqarpallaartumik katsorsaanermut atatillugu pinngitsaaliinissamik aalajangerneq aamma pinngitsaaliinermik atuneq pillugu pinngitsaaliinermik allattaavimmi paasissutissanik ilisimatinneqarnissamik toqqammavigisassaq pisinnaatitaavoq.

*Imm. 3.* Pissutissalimmik pasisap, unnerluunneqartoq imaluunniit eqqartuunneqartoq pillugu peqqissutsimut paasissutissanik misissoriikkanik allattuiiffiup imaanik ilisimatinneqarnissani toqqammavigisassap aammattaaq pisinnaatitaaffigaa, matumani pineqartoq nammineq taassuminnga takunnissinnaatitaappat, aamma toqqammavigisassap pineqartumut peqqissutsimut paasissutissanik misissoriikkanik allattuiiffianik takunnissinnaanera pineqartup akuersissutigippagu, katsorsarneqarnissamut pilersaarut ilanngullugu.

§ 17. Toqqammavigisassaq nipangiussisussaataavoq.

§ 18. Toqqammavigisassanut ataqatigiissarisumik Inatsiseqarnermut ministeri toqqaassaaq, taannalu nalunaarut manna malillugu suliassat piginnaatitaaffiillu saniatigut, toqqammavigisassanut Kalaallit Nunaanni



najugaqartunut ilitsersuinernik ilinniartitsinermillu il.il. tunngatillugu sulianik suliaqassaaq.

#### Kapitali 4

##### *Ivertitaanerup atorunnaarsinneqarnera il.il.*

§ 19. Kalaallit Nunaanni pinerluttulerinermi inatsimmi §§ 157 aamma 161 malillugit tarnikkut nappaatilinnut napparsimavimmi imaluunniit napparsimavimmi immikkoortortaqarfimmi, inunnut annertuumik tarnikkut innarluutilinnut paaqqinniffimmi imaluunniit tigummigallagaanissamik il.il. eqqartuussineq inissinneqarnissamik kinguneqanngippat, imaluunniit imaluunniit taamatut inissiinissamik periarfissiisumik eqqartuussuteqanngippat, pinerluttulerinermik suliap nalaani pissutissalimmik pasisamut imaluunniit unnerluunneqartumut toqqammavigisassatut ivertitsineq atorunnaassaaq.

*Imm. 2.* Kalaallit Nunaanni pinerluttulerinermi inatsimmi § 163, imm. 2 malillugu eqqartuunneqartumut toqqammavigisassatut ivertitsineq, pineqaatissiissut eqqartuussutigineqartoq inaarutaasumik atorunnaarsinneqarpat atorunnaarsinneqassaaq.

*Imm. 3.* Toqqammavigisassatut ivertinneqartoq allamik taarserneqarpat, toqqammavigisassatut ivertitsineq aammattaaq atorunnaarsinneqassaaq.

*Imm. 4.* Imm. 1-imi aamma 2-mi toqqammavigisassatut ivertitsineq atorunnaarpat, taamaattoq naammagittaalliuuteqarnernut, piffissami ivertitsinerup naanerani aallartinneqartunut, unnerluunneqartoq imaluunniit eqqartuunneqartoq toqqammavigisassap ikiussavaa.

§ 20. Toqqammavigisassat pillugit nalunaarsuummi toqqammavigisassap qaqugukkuluunniit nungutinneqarnissani piumasarisinnaavaa.

*Imm. 2.* Toqqammavigisassaq, toqqammavigisassat pillugit nalunaarsuummi ilanngunneqarsimasoq, pineqartup pisussaaffini, suliassaminut atasunik ingasattumik qaangiinnarpagit, § 21, imm. 1 aamma 2, aamma § 22, imm. 1 malillugit, imaluunniit allakkut suliassaminut piukkutinngitsutut paasineqarpat, suliassaminik arsaarneqassaaq. Arsaarinninneq pippat, pineqartoq toqqammavigisassat pillugit nalunaarsuummi nungutinneqassaaq.

*Imm. 3.* Imm. 2 malillugu toqqammavigisassap suliassaanik arsaarinninneq pillugu aalajangiineq, toqqammavigisassat Kalaallit Nunaanni najugaqartut pineqartillugit Kalaallit Nunaanni politiit pisortaanit aalajangerneqassaaq, aamma matumuuna § 2 malillugu toqqammavigisassanut Danmarkimi najugaqartunut, Pinerluttunik Isumaginnittoqarfiup Pisortaqarfianit

aalajangerneqassalluni.

*Imm. 4.* Pineqartumik toqqammavigisassatut ivertitsinerit pisinnaannginnerat, imm. 1 imaluunniit imm. 2 malillugu toqqammavigisassat pillugit nalunaarsuummi nungutitsinerup kinguneraa. Suli ivertinneqarnissaq pillugu apeqqut unnerluussisussaataasunit eqqartuussivimmut saqqummiunneqarnissaa, imm. 2 malillugu nungutitsinerup aammattaaq kinguneraa.

*Imm. 5.* Toqqammavigisassat, toqqammavigisassat pillugit nalunaarsuummi ilanngunneqarsimanngitsut, imm. 2-mi piumasqaatit taaneqartut assingi malillugit suliassaminnik arsaarneqarsinnaapput. Tamanna pillugu aalajangiineq eqqartuussivimmit aalajangerneqassaaq.

## Kapitali 5 *Akissarsiat*

**§ 21.** Ukiumoortumik aningaasat tunngaviusut 1.488 kr.-iusut, toqqammavigisassat pillugu nalunaarsuummi ilanngunneqarsimasunut Kalaallillu Nunaanni najugaqartunut, aamma pinerluttulerinermik suliap nalaani pissutissalimmik pasisamut imaluunniit unnerluussaasumut ivertinneqartumut, Kalaallit Nunaanni politiit pisortaata toqqammavigisassamut akilertassavaa.

*Imm. 2.* Ukiumoortumik aningaasat tunngaviusut 1.984 kr.-iusut, toqqammavigisassat pillugu nalunaarsuummi ilanngunneqarsimasunut Kalaallillu Nunaanni najugaqartunut, aamma pinerluttulerinermik suliap nalaani eqqartuussaasumut ivertinneqartumut Kalaallit Nunaanni politiit pisortaata toqqammavigisassamut akilertassavaa. Aammattaaq eqqartuunneqartup eqqartuussut malillugu inissinneqarsimanerata nalaani, qaammatit pingasut aallartinneri tamaasa Kalaallit Nunaanni politiit pisortaata toqqammavigisassamut 1.488 kr.-it akissarsiaritittassavaa.

*Imm. 3.* Toqqammavigisassat tamarmik Kalaallit Nunaanni najugaqartut, eqqartuussinerni peqataanerminnut atatillugu aamma ukiumut tikeraarluni tallimat tikillugit angalanernut atatillugu, angalanernut naleqquttunik uppersakkannillu angalanermut aningaasartuutinut akiliutiminnut taartinik piumasqaateqarsinnaatitaapput, taamaattoq tikeraarluni angalanernut, angalanermut aningaasartuutit ukiumoortumik aningaasat tunngaviusut 12.000 kr.-it qaangissanngilaat. Aningaasanut killiliussaq qulaani taaneqartoq pisuni immikkorluinnaq ittuni Kalaallit Nunaanni politiit pisortaata immikkut ittumik akuersissuteqarfigisinnaavaa. Pisariaqartinneqartumik unnuinerni matumunnga atasumik unnuinermut nerisanullu naalagaaffimmi sulisunut malittarisassat atuuttut malillugit

akiliuummut taarteqartitsisoqassaaq. Aningaasartuutitut taaneqartunut akiliutitut taartisiaqarniarneq Kalaallit Nunaanni politiit pisortaannut saaffiginnikkut pissaaq.

§ 22. Toqqammavigisassanut Danmarkimi najugaqartunut, aamma eqqartuunneqartumut ivertinneqartunut ukiumoortumik aningaasat tunngaviusut 1.488 kr.-iusut toqqammavigisassat pillugu nalunaarsuummi ilanngunneqarsimasunut, Københavnimi Kalaallit Illuutaata toqqammavigisassamut akilertassavai. Aammattaaq eqqartuunneqartup eqqartuussut malillugu inissinneqarsimanerata nalaani, qaammatit pingasut aallartinneri tamaasa Københavnimi Kalaallit Illuutaata toqqammavigisassamut 1.697 kr.-it akissarsiaritittassavaa.

*Imm. 2.* Toqqammavigisassat imm. 1-imi taaneqartut, eqqartuussinernut aamma sullitap pulaarneranut atatillugu angalanermut aamma pisariaqartinneqarpap unnuinernut, naalagaaffimmi sulisunut malittarisassat atuuttut malillugit akiliuummut taartisitinneqarnissamik piunasaqaateqarsinnaatitaapput. Aningaasartuutitut taaneqartunut akiliutitut taartisiaqarniarneq Københavnimi Kalaallit Illuutaannut saaffiginnikkut pissaaq.

*Imm. 3.* Toqqammavigisassat, toqqammavigisassat pillugit nalunaarsuummi ilanngunneqarsimanngitsut, kisianni eqqartuussaasumut Danmarkimi inissinneqartumut ivertinneqartut, eqqartuussinerni peqataanerminnut atatillugu, aamma ukiumut tikeraarluni aqqaneq marluk tikillugit angalanernut atatillugu angalanernut, naalagaaffimmi sulisunut malittarisassat atuuttut malillugit aningaasartuutitut akiliutiminnut taartinik piunasaqaateqarsinnaatitaapput. Unnuinerni nerisat naalagaaffimmi sulisunut malittarisassat atuuttut malillugit akiliuummut taarteqartitsisoqassaaq. Aningaasartuutitut taaneqartunut akiliutitut taartisiaqarniarneq Københavnimi Kalaallit Illuutaannut saaffiginnikkut pissaaq.

*Imm. 4.* Akissarsiaqartitaanissamik pisinnaatitaaffik pillugu imaluunniit akissarsiat amerlassusaat pillugit isumaqatigiinngitsoqartillugu, tamanna pillugu, Københavnimi Kalaallit Illuutaannit innersuussineq malillugu Pinerluttunik Isumaginnittoqarfiup Pisortaqarfia aalajangiissaaq.

§ 23. Toqqammavigisassap tikeraarneranut, eqqartuussinerni peqataaneranut, naammagittaalliuutit pillugit suliaqarneranut atatillugu akissarsiat saniatigut, aammattaaq suliamut atatillugu aningaasartuutit, matumani oqarasuaatitut il.il. aningaasartuutit ilanngullugit, § 21, imm. 1-imi aamma 2-mi, aamma § 22, imm. 1-imi aningaasat taaneqartut matussuserpaat.

*Imm. 2.* § 21, imm. 1-miit 3 ilanngullugu aningaasat taaneqartut (ulloq 1. april 2016-imi aningaasat tunngaviusut) Kalaallit Nunaannut aningaasanut inatsimmi Kalaallit Nunaannut akit- aama akissarsiat pillugit nalileeriaaseq atorlugu naleqqussaanermut procenti atorlugu ukiumoortumik naleqqussarneqassapput.

*Imm. 3.* § 22, imm. 1-imi aningaasat taaneqartut (ulloq 1. april 2000-imi aningaasat tunngaviusut) nunap ilaani oqartussani sulisunut naleqqussaanermut procenti qaqugukkulluunniit atuuttoq atorlugu ukiumoortumik naleqqussarneqassapput.

*Imm. 4.* Pisuni immikkorluinnaq ittuni § 18 malillugu toqqammavigisassanut ataqatigiissaarisup innersuussinera malillugu, Kalaallit Nunaanni politiit pisortaata, aamma Københavnimi Kalaallit Illuutaata innersuussinera malillugu, Pinerluttunik Isumaginnittoqarfiup Pisorta qarfiata suliap annertussusaa eqqarsaatigalugu, § 21, imm. 1-imi aamma 2-mi, aamma § 22, imm. 1-imi aningaasat taaneqartut qaffassinnaavaat imaluunniit apparsinnaavaat.

## Kapitali 6

### *Atuutilersinneqarnera il.il.*

**§ 24.** Nalunaarut ulloq 1. januar 2025 atuutilissaaq.

*Imm. 2.* Toqqammavigisassanut, nalunaarutip atuutilernerani ivertinneqartunut, nalunaarut taamatuttaaq atuutissaaq.

*Imm. 3.* Kalaallit Nunaanni pinerluttulerinermik inatsit naapertorlugu inissiisarfimmiititanut toqqammavigisassanik toqqaasarnaq pillugu nalunaarut nr. 366, af 19. april 2016-imeersoq atorunnaarsinneqassaaq.

*Inatsiseqarnermut ministereqarfik, ulloq 16. december 2024*

Peter Hummelgaard

/ Niels Dam Dengsøe Petersen